

1 San Juan

Cristo, chë nyetsca tescama
yomna tšabe vida entšanga
chamotsebomnama amá

1 ¹Bënga cbontsëbuabiamná chë Bëngbe Bëtsá ndabiajana inétsoyebuambnabiamna, chë nyetsca tescama yomna tšabe vida entšanga chamotsebomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyebuambnayana fsënjouena y bëngbe bomínýeca cha tonjama soyënga fsënjínýe. Aíñe bënga cha fsënjínýe y bëngbe cucuatšëca fsënjábojajo. ²Cha béngbentšë tonjanonýná y fsënjáninýe; chíyeca bënga chabiamna cbontsëtsëtsná y cbontsabuayiyná, nda sempre vida yobomna y nda chë nyetsca tescama yomna tšabe vida entšanga chamotsebomnama iuama. Chana, chë Taitá Bëngbe Bëtsáftaca inamna, pero mora béngbioye šojinýanyé. ³Bënga tšëngaftanga cbontsabuayiyná ntšamo tifjinýe y tifjouencá, tšëngaftanga cánýiñe mo canýacá béngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaqiñá Jesucrístoftaca. ⁴Bënga quem soyënga tšëngaftanga cbontsëbuabiamná, béngbe oyejuayana corente bëtsá cháotsemnama.

Bëngbe Bëtsá endmëna chë
entšangbiamna binýnayá

⁵Mëntšá entsemna ntšamo Jesucrístbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. ⁶Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšëne, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaqiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayaya, y echanjama bënga chabe delante tšabá chamotsatsmënama.

⁸Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe; ⁹pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyeye cachá chë ntšamo

šojiytsašebuachecá amá y nyetsca soyënguine tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. ¹⁰Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canye bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjýyëngacñe.

Cristo, bëngbe obuauyayá

2 ¹Tšëngaftanga mo atšbe basengcá, er atšbe tcbonjanéjabuache Jesucristbe tšabe noticiënguine chašmotsošbuáchema, quem soyënga cbontsëbuabiamná bacna soyënga ndoñe chašmondétsamama. Pero ndánaca Crístbeñe ošbuachiyënguentšá bacna soye tojamëse, bënga canye obuauyayá Bëngbe Bëtsabe delante montsebmoma, y cha endmëna Jesucristo, chë nyetsca soyënguine tšabá amá. ²Jesucristo tonjanóbana ndoñe nye Bëngbe Bëtsá bënga chášuaperdonama bëngbe bacna soyëngama, ndayá quem luarentša nyetsca entšángnaca chëngbe bacna soyëngama cháuaperdonama.

³Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. ⁴Pero nda tojayana: “Atšbe Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjýyëngacñe. ⁵Pero nda ntšamo Bëngbe Bëtsá ibuamëndacá tojtsama, jtsinýanýanayana chabe ainaniñe Bëngbe Bëtsabiana corente bonshánana yomnama, y

chca, mochántsetatšëmbo bënga sempre cánýiñe mo canýacá cháftaca imomnama. ⁶Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojéftsiyencá.

Canye tsëm mando

⁷Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aíñe canye tempsca mando; entsemna cach tšëngaftanga Cristbe ústonënga šmonjanobiana ora šmonjanóyëngacñe mando. Quem tempsca mando entsemna ntšamo tšëngaftanga bëngbentšana šmonjouencá.

⁸Pero masque chca endmëñe, quem cbontsëbuabiamná soye tšëngaftangbiana echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftángnaca cachcá šmondoyena, er chë bacna juabnënga jtsebmönëse mo ibetiñcá jtsiyenana tempo ya echanjochnëngo, y chë entšangbe juabna ndegombre binýnayá ya entsebuashinýinýana.

⁹Nda tojayana chë binýnayáftaca yojtsemna ca, pero cha chabe catsátbiye tbojtsáboyënja, cha cabá tempcá, bacna juabnënga jtsebmönëse yojtsiyena, mo ibetiñcá. ¹⁰Nda chabe catsátbiye tbojtsebobonshana, cha chë binýnayáftaca jtsiyenana, y tondaye queochátsmëna cha bacna soye chaotsamama. ¹¹Pero nda chabe catsátbiye tbojtsáboyënja, cha bacna juabnënga jtsebmönëse jtsiyenana, mo canýa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebmönëse jtsiyenana chábíoye ndoñe

ntjalesénciana ntšamo tšabá yomncá chaotsamama.

¹² Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. ¹³ Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëngnaca cbontsëbuabiamná, er tšëngaftanga ya chë nyetsca bacna soyënga mandayá Sanatás šmonjayëñjaná.

¹⁴ Básenga, tšëngaftanga tcbonjubaábiana, er tšëngaftanga chë Taitá ya šmonjuábuatmana. Taitanga, tšëngaftanga tcbonjubaábiana, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tcbonjubaábiana, er tšëngaftanga bëtsá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nyetsca bacna soyënga mandayá šmonjayëñjaná.

¹⁵ Ndoñe matsbošana oyejuayënga jtsemnana nye quem luarentša soyëngaca, ni nye chë soyënga jtsebmomnama. Nda yapa tojtseboše quem luarentša bacna soyënga jtsebmomnama, cha ndoñe chë Taitábiye bondbobonshana. ¹⁶ Er chë nye quem luarama enójuabnayënga mëntšá juabnënga mondbomna: yapa jtsebošana jtsebmomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá tmojátinye soye; y yapa jtseñábotamnayana chë tmobomna soyëngama. Chë juabnënga Bëngbe Bëtsábíocana ndoñe ntsóbocanana, ndayá nye chë quem luarama enójuabnayëngbentsana. ¹⁷ Pero quem luare echanjopochóca y nyetsca

chentša soyënga, chë entšanga bacna juabnëngaca yapa imoboše jtsebmomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebmomna.

Chë Cristbe contra yomná

¹⁸ Básenga, quem luare jopochócamo tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócamo tempo ya yojtsobecuama. ¹⁹ Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

²⁰ Pero Cristo, chë Uamaná, tšëngaftanga tcmonjabacacá, y cha tonjama chë Uamana Espiritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatšëmbo. ²¹ Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aífne šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cányíñe jtsemnana ndoñe yondopodénama. ²² Nda tojayana Jesús chë Bëngbe Bëtsabe Uamana Uabuayaná, chë Cristo ndoñe

yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. ²³Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canýacá ndoñe ntsemnana. Pero nda entsángbeñe tojayana, Cristo aïñe Bëngbe Bëtsabe Uaquiñá endmëna ca, chana aïñe chë Taitáftaca cányiñe mo canýacá jtsemnana.

²⁴Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canýacá šmochántsemna.

²⁵Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebomnana.

²⁶Atše chca cbontsëbuabiamná, chë tšëngaftanga jáingñayama imojtsebošëngbiana. ²⁷Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebomna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmojabuatambacá jtsiyenëse, Crístoftaca cányiñe mo canýacá šmochtsemna.

²⁸Y mora básenga, Crístoftaca cányiñe mo canýacá šmochtsemna,

chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. ²⁹Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

Cristbeñe ošbuáchiyënga, Bëngbe Bëtsabe básenga

3 ¹Menójuabonga, ntsachetšá Bëngbe Bëtsá chë Taitá šondábabuanjeshanama. Chabe bonshánana tša bëtscá endmënayeca, bënga šondëubuabuatma chabe básenga ca, y ndegombre bënga chca mondmëna. Chë causa chë nye quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana. ²Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuatstatšëmbo ntšamo más chcoye bënga mochjamnana, aïñe mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá. ³Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

⁴Pero nda bacna soye tojama, chana ntšamo Bëngbe Bëtsá tojëftsemnadacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemnadacá. ⁵Tšëngaftanga ya šmondëtatšëmbo Jesucristo quem

luaroye tojánabo bəngbe bacna soyənga jabətsabuajuanama, y cha ni mo canyə bacna soye ndoñe yondbomnama. ⁶ Chcasna, nda cānyīñe mo canyáca cháftaca nyetsa tempo tojtsemna, ndoñe ntsiyenana bacna soyənga jtsaməse. Pero nda tojtsiyena bacna soyənga jtsaməse, Jesucristbiama ndoñe tbonjosertá y ndoñe yondétatšəmbo ntšamo cha bétsemnama. ⁷ Atšbe básenga, ndocná chacmondaingñe: nda nyetsca soyənguñe tšabá tojtsama, cha canyə tšabá mándbomna entšá jtsemnana, ntšamo Jesucristo yomncá; ⁸ pero nda tojtsiyena bacna soyənga jtsaməse, chabe ainaniñe Satanás jtsemádayana, er Satanás quem luare jobojátšama orscana bacna soyənga iuétšama. Bəngbe Bətsabe Uaquiñá nya quem soyama tojabo: chə Satanasbe soyənga jabétseepochocama.

⁹ Ndocná Bəngbe Bətsabe uaquiñá tojtsemná jtsiyenana bacna soyənga jtsaməse, er cha jtsebmomnana chə Bəngbe Bətsá tbojuántšame tšabe vida, y Bəngbe Bətsá chabe Taitá endmēna. Chiyeca cha ndoñe ntsiyenana bacna soyənga jtsaməse. ¹⁰ Corente jtsotatšəmbuana ndəmuanyənga Bəngbe Bətsabe básenga imomnana y ndəmuanyənga Satanasbe básenga; ndəmuanyəngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bəngbe Bətsabe básenga.

Nyetscanga jtsenbobonshánana

¹¹ Quem buayenana entsemna ntšamo tšəngaftanga šmojanuena, tšəngaftanga Cristbe ústonənga šmonjanobiama orscana: nyetscanga šontsamna jtsenbobonshánama. ¹² Ndoñe Caincá muatjama. Chabe

ainaniñe Satanás yojamánda, y chiyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana añe; chiyeca tbojtsanóba.

¹³ Jesucristbeyeca atšbe catšátanga, ndoñe šmattsenjanayə chə nyə quem luarama enójuabnyənga cmojtsébuayənjama. ¹⁴ Bənga mondetatšəmbo, bənga tempo monjaniyena chə nyə quem luarama enójuabnyənga mondoyencá, y chca, Bəngbe Bətsabiama mo obanəngcá monjamna, er bənga monjaniyena ntšamo Bəngbe Bətsá ndoñe yondəmandacá. Pero Bəngbe Bətsá tonjama mora bənga tsəm vida chamotsebmomnana, y chca, mo ndegombre ainəngcá montsemna. Chca mondetatšəmbo, er bənga bəngbe catšátangbioye mondábuanyëshana. Nda chabe catšátbioye ndoñe tbonsebobonshana, cha cabá mo obanacá jtsiyenana. ¹⁵ Nda cachabe catšátbioye tbojtsáboyənja, cha jtsemnana mo entšanga obanayacá. Y tšəngaftanga šmondətətšəmbo entšanga obanayá ndoñe ntsobenana jtsiyenana, chə nyetsca tescama yomna tšabe vida chabe ainaniñe jtsebmomnəse.

¹⁶ Ndayá chə jtsenbobonshánana bétsemnama mēntšá montsetátšəmbo: Jesucristo chabe derecho vida jtsobomñama cachcá tojanonjá y bəngbiama tojanóbana; cachcá bənga šontsamna jtsemnana, sempre jtseprontánana chə Jesucristbeyeca bəngbe catšátangbiama jóbanama. ¹⁷ Canyá bomnana tojtsebmomna y catšátbioye uajabotá tbojtsónjá, pero chabiama ndoñe tbonjongmé y ndoñe tbonjuájabuache, cha ndoñe ntsobenana Bəngbe Bətsabiama ainaniñe bonshánana jtsebmomnana. ¹⁸ Atšbe básenga,

ndoñe quešnátamna nÿe bÿngbe catšátanga imuababuánÿeshana ca jatichámuana, y nÿe chÿ bonshánama jatóyebuambnayana; pero ndegombre šontsamna ndayánaca jamana, chca, jinÿanÿiyama, bÿnga ndegombre inÿengbiamu imuababuánÿeshanama.

**Bÿngbe Bÿtsabe delante
natjÿmbana ainánaca entšanga**

¹⁹ Chcase bÿnga mochántsetatšÿmbo, ntšamo chÿ Bÿngbe Bÿtsabe ndegombre soyÿnga yomncá bÿnga imojtsamama. Y bÿnga ndoñe quemochátenocochinÿena, Bÿngbe Bÿtsábica jtsemnana mercedo ndoñe mondbuájona ca tmojtsejuabná ora; y bÿngbe ainana natjÿmbana Bÿngbe Bÿtsabe delante echántsemna. ²⁰ Bÿnga chca bÿngbe ainaniñe tmojtsejuabná ora, bÿnga montsobena natjÿmbana ainana jtsebomnana, er Bÿngbe Bÿtsá corente jtsotatšÿmbñana ntšamo bÿngbe ainana yomnana, y cha lempe yotátšÿmbo. ²¹ Atšbe bonshana entšanga, bÿnga ndoñe bacna soye tmonjama ca bÿngbe ainaniñe tmojtsejuabnase, jtsobenana añémoca jtsemnana y tondayama ntsauatjácá Bÿngbe Bÿtsabe delante jtsemnana. ²² Y cha lempe ntšamo chamojotjañácá šochanjátšataye, er bÿnga montsama ntšamo Bÿngbe Bÿtsá ibuamandacá y ndayá chabe bominÿiñe tšabá yomncá. ²³ Y chabe mando endmëna: bÿnga chabe Uaquiñá Jesucristbeñe jtsošbuáchiyana, y bÿnga nÿetscanga jtsebomnana ntšamo Jesús šojÿftsamëndacá. ²⁴ Ntšamo Bÿngbe Bÿtsá tojÿftsemandacá amënga, Bÿngbe Bÿtsáftaca cánÿiñe mo canÿacá jtsemnana, y cha sempre chëngaftaca cánÿiñe mo canÿacá echanjÿftsemna. Y quem sóyeca bÿnga montsobena jtsetatšÿmbuana cha bÿngaftaca

iuétsemnana: Uámama Espiritu bÿngbe ainaniñe cháumashënguama cha tojama.

**Chÿ Bÿngbe Bÿtsabe Espiritu y
chÿ Cristbe uayayabe espíritu**

4 ¹ Atšbe bonshana entšanga, nÿetscanga chÿ Bÿngbe Bÿtsabe juábncaca imoyebuambná ca ichámëngbiocyte ndoñe šmattsayaunana; botamana šmochjuarrepára corente jtsetatšÿmbuama chënga aínë o ndoñe chÿ Bÿngbe Bÿtsabe juábncaca imóyebuambnama. Quem tempo banga Bÿngbe Bÿtsabe ndoñe ndegombre juabna oyebuambnayënga quem luarëjana mondajna. Chÿ causa tšëngaftanga cmontsamna botamana chëngbiamu juarrepárana. ² Chÿ Bÿngbe Bÿtsabe Espiritu ndegombre imobomnëngbiamu tšëngaftanga mëntšá šmontsobena jtsetatšÿmbuana: nda tojayana Jesucristo quem luaroye aínë entšacá tojánabo ca, cha ndegombre chÿ Bÿngbe Bÿtsabe Espiritu yojtsebomna. ³ Pero nda ndoñe chca Jesucristbiamu tonjayana, cha Bÿngbe Bÿtsabe Espiritu ndoñe yontsebomna; inÿetšá, chana chÿ Cristbe contra yomnabe espíritu yojtsebomna. Tšëngaftanga šmojouena chÿ espíritu yochjabama; pero ndegombre cha ya quem luarentšë entsemna.

⁴ Atšbe básenga, tšëngaftanga Bÿngbe Bÿtsábenga šmondmëna y ndoñe šmonjalesenciá chÿ Bÿngbe Bÿtsabe ndoñe ndegombre juabna oyebuambnayënga tšëngaftangbiocyte chacmaingñëma, er chÿ nÿets tempo tšëngaftangbe ainaniñe vida endbomná, chÿ nÿe quem luarama enójuabnayëngbe ainaniñe mándayabiamu más obená endmëna. ⁵ Chÿ Bÿngbe Bÿtsabe ndoñe

ndegombre juabna oyebuambnayëngna chë nÿe quem luarama enójuabnayënguentshana mondmëna, chíyeca chënga nÿe quem luarentša soyëngama jtsóyebuambnayana, y chë nÿe quem luarama enójuabnayënga chënga jtsayaunanana. ⁶ Pero bënga Bëngbe Bëtsábënga mondmëna. Nda Bëngbe Bëtsábïoye tbojtsabatma, béngbïoye jtsayaunanana; pero nda Bëngbe Bëtsábïoye ndoñe tbontsabuatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiama, y nda chë ínÿëngbïoye jáingñama ama espíritu yobomnabiámna.

**Chë bonshánana Bëngbe
Bëtsábïocana yóbocana**

⁷ Atšbe bonshana entšanga, chë bonshánana Bëngbe Bëtsábïocana endóvocana; hcacase, bënga šontsamna nÿetscanga jtsenbobonshánana. Nda Bëngbe Bëtsábïoye y chë inÿe entšángbïoye tojtsababuánÿeshana, cha Bëngbe Bëtsabe uaqiñá jtsemnana y Bëngbe Bëtsábïoye jtsabatmana. ⁸ Nda ndoñe chca tontsebobonshana, cha Bëngbe Bëtsábïoye ndoñe ntsábuatmana, er Bëngbe Bëtsá bonshanánaca nÿetsca soyënga jamana. ⁹ Bëngbe Bëtsá šonjinÿanÿé bënga šuababuánÿeshanana, cha chë nÿe canÿe Uaqiñá ibobomná quem luaroye jíchmuase; cha tbojanichmó, bënga chábeyeca chë nÿetsca tescama yomna tšabe vida chamotsebonnama. ¹⁰ Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaqiñá tbojanichmó, cha jóbanëse,

bënga bëngbe bacna soyëngama perdonánënga chamotsebonnama.

¹¹ Atšbe bonshana entšanga, Bëngbe Bëtsá chca šuababuánÿeshana; hcacasa, béngnaca šontsamna nÿetscanga jtsenbobonshánana. ¹² Ndocná ndocna te Bëngbe Bëtsábïoye tbonjinÿe. Bënga nÿetscanga tmojtsenbobonshánëse, Bëngbe Bëtsá nÿets tempo béngaftaca echántsemna, y chabe bonshánana puerte bëtscá béngbeñe echántsemna. ¹³ Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnana y cha béngaftaca: cha tonjanma chabe Espíritu bëngbe ainaniñe cháumashënguama. ¹⁴ Y cach bënga fsënjinÿe y entšanga fsëntsëtsëtsná, chë Taitá chabe Uaqiñá tbojichmoma, quem luarentša entšanga jabátsebacama. ¹⁵ Ndánaca tojayana Jesús Bëngbe Bëtsabe Uaqiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá. ¹⁶ Hcacasé bënga montsetatšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nÿetsca soyënga bonshanánaca jamana y nda Bëngbe Bëtsá y chë inÿe entšanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. ¹⁷ Hcaca, Bëngbe Bëtsabe bonshánana puerte bëtscá béngbeñe echántsemna, bënga bëts añémoca y tondayama ntsauatjca chamotsebonnama, chë tšabá o ndoñe tšabá tmonjamama entšangbïama jayanama Cristo yochjésabo orscama; er bënga Jesucrístoftaca cánÿiñe mo canÿacá jtsemnëse, quem luarentše mondmëna ntšamo Jesucristo endmëncá. ¹⁸ Nda Bëngbe Bëtsá y chë

inÿe entsanga tojtsababuányeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtsebmomnana. Canÿe entsá tojtsauatja ora, jtsemnana mo chabe castigo ya cuafjobjatsecá. Chca, nda uatjana tojtsebmomna, Bēngbe Bētsábioye y chē inÿe entsanga cha ndoñe corente yondábabuanÿeshana, ntšamo Bēngbe Bētsá bēnga šuababuanÿeshancá.

¹⁹Natsana Bēngbe Bētsá šojánababuanÿeshana, y chíyeca bēnga, cha y chē inÿe entsanga imuababuányeshana. ²⁰Nda tojayana: “Atše Bēngbe Bētsábioye séndbobonshana ca”, pero cachca ora cachabe catšátbioye tbojtsáboyēnja, cha canÿe bostero jtsemnana. Canÿa añe jtsoebenana chabe catšata jinÿama; y cha chē catšátbioye ndoñe tbontsebobonshana, ndegombre cha Bēngbe Bētsábioye ndoñe bondbobonshana, ndábioye jinÿama ndoñe ntsoebenana.

²¹Y bēnga quem mando chábéntšana tmonjanóyēngacñe: nda Bēngbe Bētsábioye tbojtsebobonshana, cachabe catšátbioynaca chabotsebobonshana ca.

**Chē Jesucristeñe ošbuachiyá
endobena Satanase
soyēnga jayénjanana**

5 ¹Nda tojtsošbuaché Jesús chē Uámana Uabuyaná, chē Cristo yomnama, cha Bēngbe Bētsabe uaquiñá jtsemnana; y nda canÿe taitábioye tbojtsebobonshana, chē taitabe uaquiñábioynaca cha jtsebobonshánana. ²Bēnga Bēngbe Bētsá tmojtsebobonshana y ntšamo cha tojtsemandacá tmojtsamēse, bēnga ndegombre mochántsetatšēmo, chē Bēngbe Bētsabe basengbioynaca

bēnga imuababuányeshanama. ³Bēnga Bēngbe Bētsábioye imobobonshánama quem soyiñe jtsinÿnana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa totcá quenátsmēna bēnga chamotsamama. ⁴Nda Bēngbe Bētsabe uaquiñá tomna, chana jáyēnjanana quem luarentša entsanga y soyēnga ntšamo Satanás yomandacá. Quem luarentša entsanga y soyēnga ntšamo Satanás yomandacá, Crístbeñe bēnga imošbuachéyeca montsobena bēnga jáyēnjanana. ⁵Nÿe nda, Jesús Bēngbe Bētsabe Uaquiñá yomnama tojtsošbuaché, cha jtsoebenana chē entsanga y soyēnga ntšamo Satanás yomandacá jayénjanana; ndocná más.

**Bēngbe Bētsá tojinÿanÿé
ntšamo chabe Uaquiñabiana
ndegombre yomncá**

⁶Cach Jesucristo endmēna nda quem luaroye tojánabo y mēntšá tojanenonÿinÿé: búyeshca cha tmojanabaye ora, y buiñe juabuáshanēse cha tonjanóbana ora. Cha ndoñe tonjanenonÿinÿé nÿe búyeshca, ndayá búyeshca y buiñeca. Cach Uámana Espiritu entsobena jayanana chca ndegombre bétsemnama Jesusbiana, er chē Espiritu endmēna chē sempre ndegombre oyebuambnayá. ⁷Endmēna unga soyēnga, ndayá iuinÿanÿná ntšamo ndegombre yomncá Jesusbiana: ⁸Espiritu, búyeshca y buiñe; y chē unga soyēnga lempe cachcá Jesusbiana jtsinÿanÿayana. ⁹Bēnga mondbétsejuabnaye, ndayá entsanga tmojinÿe ca tmojtsichámuama mo ndegombre cuaftsemncá, pero ndayá Bēngbe Bētsá tojtsichamcá chē ndegombre soye jtsemnana y puerte jtsámanana, er chē ndegombre soye ntšamo cha tojtsichamcá, endmēna

ndayá chabe Uaquiñabiana iuichamcá.

¹⁰Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe booster cuaftsemncá, er chë Bëngbe Bëtsá chabe Uaquiñabiana tojayana soyama cha jtsejuabnayana ndoñe ndegombre yontsemna ca. ¹¹Ntsamo Bëngbe Bëtsá chabe Uaquiñabiana tojayancá mëntšá entsemna: Bëngbe Bëtsá bëngbiama tojama chë nÿetsca tescama yomna tšabe vida chamotsebomnama; y quem vida chabe Uaquiñábeñe entsemna.

¹²Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nÿetsca tescama yomna tšabe vida ndoñe ntsebomnana ca.

**Inÿe soyëngama jábuayenama
y jtadióšoftanama**

¹³Tšëngaftanga, chë Bëngbe Bëtsabe Uaquiñábeñe šmošbuachëngbioye quem soyënga cbontsëbuiamná, ndegombre chašmotsetatšëmbuama chë nÿetsca tescama yomna tšabe vida šmojtsebomnama.

¹⁴Bënga bëts añémoca y ndauatjá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. ¹⁵Nderado ndayá chca Bëngbe Bëtsábioye tmojtsotjanañe ora, cha bënga jyaunayana; bënga mondétatšëmbo chca ndegombre yomnama, y chca, bëngnaca montsetátšëmbo, ndayánaca chábioye bënga chamojtjañcá cha šochjátšatayama.

¹⁶Nda cachabe catšátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nÿetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canÿe bacna soye endmëna, y chca tojamama canÿa ndoñe ntsoberenana perdonaná jtsemnana, y chca, cha jabocnana canÿa nÿetsca tescama castiganá chaotsemnana, y atšë ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. ¹⁷Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnana.

¹⁸Bënga mondétatšëmbo, nda Bëngbe Bëtsábioye mo taitacá tbojtsebomna, cha ndoñe ntšiyenana bacna soyënga jtsamëse, er chë Bëngbe Bëtsábentšana Onÿnaná chábioye jtsinÿenana, y Satanás, chë nÿetsca bacna soyënga amëndayá, tondaye ntsoberenana chábioye jabórlana. ¹⁹Bënga mondétatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inÿe entšanga Satanasbe cucuatšinë imomnama. ²⁰Bëngnaca mondétatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatmama. Bënga chë ndegombráftaca cánÿiñe mo canÿacá mondmëna, bënga chabe

Uaquiñáftaca cánýiñe bétsemnayeca.
Cha chë ndegombre Bëngbe Bëtsá
endmëna, y nda chë nyetsca
tescama yomna tšabe vida entšanga
chamotsebofnama iuamá. ²¹Atšbe

básenga, ndoñe šmattsadorana
cach entšangbe pormana
soyënga, chë ndayama ínýenga
mondbétsejuabnaye diosënga yomna
ca.